

Imigassaq - naliginnaasumik innersuussutit

PAASSISSUTISSAT

Imigassaq Ikiaroorartullu pillugit Siunnersuisoqatigiit kaammattuutaat:

1. Inuusuttut 18-it inorlugit ukiullit imigassaq ingalassimalluinnartariaqarpaat
2. Piffimmi ataatsimi najoqqagassat amerlanerpaat sisamat
3. Naartunerup siorna nalaanilu kiisalu milutsitsinermi imigassartornaveersaarit

Ingasaassinngitsumik imertoqarpat allat ilagalugit imigassartorneq nuannersinnaavoq. Imigassartornerli aarlerinartortaqqarpoq. Imigassat pinngitsuuisinnaajunnaarsitsisinnaavoq timikkut, isumakkut inooqataaniarnikkut arlalitsigut ajoqusiisinnaasoq.

Imigassartornerujartortillutit pinngitsuuisinnaajunnaarnissat nappaateqalernissallu ilimanarnerlissaaq.

Imigassaq nappaatinut qanorluissutsinut 60-init amerlanerusunut, assersuutigalugu kræftimut, tingullunermut uummallunermullu, attuumassuteqqarpoq. Tamanna atuuppoq piffissami killilimmi annertoorujus-suarmik imigassartoruit (engukkuit) aamma piffissami sivisunerusumi annertuumik imigassartoruit.

Imigassamik pinngitsuuisinnaannginneq peqqissutsikkut kingunerlutsitsinerup saniatigut aamma inooqa-taaniarnikkut kingunerlutsitsisinnaavoq. Aappariinnerlutsitsilersinnaavoq, sulisarninnut sunniuteqarsinnaavoq, meeqqanik sumiginnaasitsisinnaavoq, nakuusertitsisinnaavoq naggataatigullu ajunaarnermik, pinerlunermik toqutsinermilluunniit kinguneqartitsisinnaalluni.

Imigassamik atuinivit appartinnissaanut unitsinnissaanulluunniit peqqissutsikkut iluaqutissartaqqarpoq. Katsorsarneqarsinnaanngitsumik nappaateqarnermi isumatsaqqanermilu imigassamik atuinerup annikillisinnera unitsinneraluunniit sukkanerusumik peqqissinissamut attuumassuteqqartarpoq.

Innersuussutit

Imigassaq Ikiaroorartullu pillugit Siunnersuisoqatigiit najoqqagassatut killissarititaasutut kaammattuuti-gaat;

- Arnanut, sap.ak. najoqqagassat arfineq-marluk
- Angutitut, sap.ak. najoqqagassat 14-it
- Piffimmi ataatsimi najoqqagassat amerlanerpaat sisamat

Najoqqagassaq ataaseq tassaavoq immiaaraq viinnisorfilluunniit ataaseq.

Imigassartorneq tamatigut arlaatigut peqqissutsinnik innarliisinnaavoq, kisianni imigassamik atuinermik peqquteqartumik napparsimalernissat ilimananginnerussaaq kaammattuutit uku najoqqutarisarukkit.

NEQEROORUT

Inuit ilaasa ajoqutaasumik imigassamik atuisarunnaarnissartik sapernartissinnaasarpaat. Imertarunnaarnissaq sapernartikkukku pingaaruteqarpoq sapinngisamik piaarnerpaamik sullissisunnut saaffiginninnissat imaluunniit Allorfimmut, pinngitsuuisinnaanginninnik katsorsaasinnaasumut, attaveqarnissat.

Kalaallit Nunaanni najugaqartut tamarmik akeqanngitsumik pinngitsuuisinnaanginnermut katsorsarneqar-sinnaapput.

Allorfik ugguuna attavigisinnaavat 52 53 43, piffissami 09:00-imiit 15:00-imut, imaluunniit mailikku allorfik@allorfik.gl.

Illoqarfinni Allorfilinni (Qaqortumi, Nuummi, Sisimiuni, Aasiaanni aamma Ilulissani) ornigullutit saaffiginnissinnaavutit nal. 9-15.

Ullumikkut innuttaasut 18-it sinnerlugit ukiullit kisimik katsorsarneqarsinnaapput. Allorfinnili innuttaasunut 18-it inorlugit ukiulinnut killilimmik neqerooruteqarpoq.

Allorfiup nittartagaani paasisaqarnerusinnaavutit uani www.allorfik.gl

NAMMINEQ QANOQ ILIUSEQARSINNAAVUNGA

Imigassamik atuisarnivit appartinnissaa unitsilluinnarnissaaluunniit sapernarsinnaavoq. Inuup ataasiinnaap maanna taamaaliortoqassanersoq aalajangersinnaavaa, inullu taanna tassaavoq illit.

Annikinnerusumik imertalerniarlutit aalajangeruit ilorraap tungaanut alloriassaait. Ileqqumik, immaqa inuuninni intoorujussuarmik, allanngortitsinissap sapernarsinnaanera piareersimaffigisariaqarpat. Qanorluunniit artorsartigissagaluarluit eqqaamajuartariaqarpat ileqqut allanngortinneqarsinnaammata, aamma upperisariaqarpat allannguisinnaallutit.

Imerpallaarunnaarnissamut imigassartunngilluinnarnissamulluunniit periutsit assigiinngitsuupput. Periuseq ilinnut naleqqunnerpaaq nassaarisariaqarpat.

Assersuutigalugu:

- ulluinnarni imigassamik imertarunnaarsinnaavutit
- imikkatit akunnilersinnaavatit sodavandimik, juicemik allamilluunniit
- allat ilittulli atugallit attaviginiarsinnaavatit

- imigassaq eqqarsaatigiunnaarumallugu arlaannik sammisaqarsinnaavutit
- ilaquttannit ikiorneqarsinnaavutit
- sullissisumik oqaloqateqarsinnaavutit

Nuannersut siunissarlu eqqarsaatiginerisigut imigassamik atuisarnivit iliuuseqarfiginissaanut aalajangiusermanninnerit ajornannginnerulissaaq.

Taava piviusorsiortumik anguniagaqarnissat tullernguuppoq. Ullormiit ullormut tupinnartuliortoqarnissaa naatsorsuutigisinnaanngilat. Ileqqup iperarnaviikkap allanngortinnissaata sivisusinnaanera piareersimaffigisariaqarpat. Ullormiit ullormut imigassartortarunnaarsinnaannginnerit arriitsumillu imigassamik atuivutit appariartortussaanaera akueriuk. Nakkartooruit iluatsissinnaanngitsutut imminut eqqartuuteqinak. Aqaguani aallaqqaataaniit aallartigit anguniakkallu isiginiarlugu.

Annikinnerusumik imertalernissat illit nammineq aalajangissavat, ulluinnarnili ilinnik tapersersuisinnaasunik ikiorteqarnissat iluaqutigisinnaavat. Ajornartorsiutit tamannalu pillugu iliuuseqarniarnerit unneqqarillutit eqqartortarukku ilimanarnerussaaq ilaqtavutit, ikinngutivit suleqativillu ikiussagaatsit.

Annikitsut, soorlu imerusulernermi ikinngutigilluakkamut sianernej imaluunniit ilaqtavutit imigassamik imernaveersaarnerat, iluaqutaasinnaapput.

QANIGISAT

Pinngitsuuisinnaajunnaartoqartillugu ilaqaatasut meeqqallu naallioqataasarput, aamma ilaqaatasut amerlasuut qanoq iliornissartik pinngitsuuisinnaannginnerlu pissutigalugu ikit qanoq pitsaanerpaamik mamitinniassallugit nalornissutigisarpaat.

Imigassamik pinngitsuuisinnaanngitsumut ilaqaatasut inersimasut ilaqtariinnik katsorsaanermut ilaasinnaapput.

Ilaqtariinnik katsorsaaneq ilaqaatasuni inersimasunut tunnganeruvoq, siunissamili aamma meeqqanut tunngalertussaassaaq.

Ilaqtariinnik katsorsaanermi amerlanertigut ilinniartitsisoqartarpoq, sungiusartoqartarpoq eqimattatullu suleqatigiittoqartarluni. Pinngitsuuisinnaannginnerlu suunersooq pinngitsuuisinnaannginnerlu ilaqtariinnut qanoq sunnuteqartarpoq pillugu ilinniartitsisoqartarpoq. Ilinniartitsinermi peqataasut inummumut pinngitsuuisinnaanngitsumut ilaqaatanermut atatillugu misigissutsit artornartut eqqartornissaanut suliarinissaannullu periarfissaqartarput.

Uani atuarnarugit: www.allorfik.gl

SAAFFIGINNINNISSAMUT PAASISSUTISSAT

[Sullissiviup nittartagaani illit kommuninni sullissisorisat attavigiuk.](#)

www.allorfik.gl

-->